

四庫全書

史部

欽定四庫全書

史部

今獻備遺卷一至六

詳校官侍讀_臣陳萬青

刑部郎中_臣許兆椿覆勘

覆校官中書_臣宋鎔

校對官中書_臣王鍾泰

謄錄舉人_臣劉禮

欽定四庫全書

史部七

今獻備遺

傳記類三

總錄之屬

提要

臣等謹案今獻備遺四十二卷明項篤壽撰
篤壽字子長秀水人是編專採明代名臣事
跡編為列傳起洪武訖嘉靖計二百四人蓋
本袁褱所著而稍增損之明史藝文志亦載
有其目其曰備遺者自序謂姑備遺忘蓋謙

言之不敢以作史自任也明代文人類多留意掌故其以累朝人物彙輯成書者如雷禮之列卿記徐紘之名臣琬琰錄焦竑之國史獻徵錄卷帙最為浩博而冗雜汜濫不免多所抵牾篤壽此書頗為明簡有法雖其中記載亦未能悉當如劉基飲西湖上見西北雲氣謂是天子氣在金陵我當輔之此術家附會悠謬之談今明史已刊削不取而篤壽

乃著之基傳中實不免於輕信又如徐有貞
之悍驚李東陽之模稜張孚敬之偏愎皆未
可稱一代完人而篤壽並推重甚至其進退
亦為寡識然序述詳贍凡其間年月先後事
跡異同皆可以為博攷叅稽之助視他家之
猥俗龐襍者義例較為謹嚴於史學未嘗無
裨益也乾隆四十二年二月恭校上

總纂官

臣

紀昀

臣

陸錫熊

臣

孫士毅

總校官臣陸費墀

今獻備遺原序

世譚昭代文獻者無慮數家大都畧同而文直事核則
端簡鄭公名臣記及古和雷公列傳為詳其他諸家皆
可觀採而牴牾同異罕有統歸微隱節槩亦多疎濶間
或委巷叢叢幽鄙俚雜譏夫嫁禍之口諛墓媚竈之篇
文既不闕信寧可傳哉嘉靖初胥臺袁公博雅多聞起
自開國迨于康陵公卿將相烈士才人崇勲懋德純懿
孤稜稱首八朝者論次成編貫穿附離用意良勤矣篤

壽病廢餘閒居多暇日輒不自揆稍加芟剪漫附臆揣
姑備遺忘譚者又謂陽秋古人義兼美刺今之所撰溢
焉褒稱曾不知譽當有試他闕何妨即永陵以來名臣
碩德彬彬有聞雖蓋棺論定良可考信而採摭未備姑
且已之其諸忠節佚事不可遺亦未可詳也錄而藏焉
聊以存厚亦以用諱云爾嗟乎生人每不幸世亦鮮有
完人思廉史材也揚名祖父祇貽嫺鄙休文詆毀裴宗
招颺家醜妄意點人乃以自點所謂無言不讎即弄其

文墨不足道也若乃天刑鬼禍尚口興戎昌黎之于柳
州辨論詳矣可不畏哉項篤壽序

欽定四庫全書

今獻備遺卷一

明 項篤壽 撰

徐達

徐達濠州人元至正癸巳滁陽王郭子興據濠達與太祖高皇帝以兵屬焉達委心事太祖從授鎮撫勇略冠軍位諸將上乙未太祖為孫德崖軍所執郭子興亦方繫德崖達身易太祖歸而郭亦歸德崖以易達由是寵信日隆從渡江下采石太平擄元陳也先太平城下東

取溧水溧陽所至輒克丙申從入建康拜大將軍浮江而下大破元軍克京口授鎮江翼元帥府統軍大元帥遷江南等處行樞密院同僉進攻毘陵擒張士誠弟張九六及其將張德丁酉克毘陵進僉院徇下寧國宣城取馬駝沙戍戍克宜興太祖征婺州達守建康己亥以池州功進奉國上將軍同知樞密院征皖城擊趙普勝軍浮山砦破之得潛山庚子陳友諒寇池州設伏破之張士誠陷我宜興攻復之辛丑進江南等處行中書省右

丞從攻江州陳友諒走武昌屯兵夏口還守江州召還
復命守江州比至友諒已先入城守與戰大破之壬寅
取豫章進征武昌而友諒將康泰以豫章叛還擊擒之
癸卯張士誠寇我壽春太祖往救之達為前鋒破士誠
軍遂圍廬州而友諒復寇豫章詔罷圍來救豫章太祖
督諸將征友諒師次彭蠡湖友諒軍精甚達先驅陷陳
俘其軍友諒軍奪氣達還守建康我軍乘勝鏖戰竟殲
友諒語在開平王事中甲辰進左相國武昌平略取廬

州諸郡已太祖下令伐張士誠拜達為大將軍常遇春為副帥師東下大破士誠軍吳興阜林下湖州進圍姑蘇達軍對門常遇春軍虎丘有與滁陽王同名郭子興者軍婁門華雲龍軍胥門湯和軍閭門王弼軍盤門張溫軍西門康茂材軍北門耿炳文軍城東北仇成軍城西南何文輝軍城西北築長圍困之架木塔與城中浮屠等築臺三成曰敵樓下瞰城中上置弓弩火筒又置襄陽礮所擊輒破城中大震丁未達從軍中上封事

太祖勅勞之曰古者帝王之興必有命世之士以為輔
佐成周伐罪鷹揚奮興炎漢仗義羣策畢舉所以克集
大勲肇啓隆祚者也將軍自昔相從忠義天性然且沈
毅有謀端重有武故能遏絕亂略消弭羣慝建無前之功雖
古豪傑不能過也今所請事悉欲稟命而行此賢臣事
君之道吾甚嘉之然將在外君不御乃古道也自後軍
中緩急將軍其從便宜行之姑蘇城破擒張士誠送建
康得兵二十五萬師還封信國公賞賜冠諸將拜北征

大將軍遂伐中原太祖諭諸將曰征伐以奉天命平禍
亂安生民故命將出師必在得人諸將非不健鬪然能
持重有紀律戰勝攻取得將體者莫如大將軍達宜專
主中軍策勵羣帥運籌決勝不可輕動進克沂州王宣
降取益都定兗州郡縣下濟南洪武元年太祖即皇帝
位進銀青榮祿大夫上柱國錄軍國重事中書右丞相
信國公兼太子少傅克樂安沂河取汴梁李景昌遁去
由虎牢關入洛陽攻潼關李思齊走鳳翔張思道奔鄜

城遂入潼關徇取華陝禹許陳汝諸州及諸山寨太祖
幸汴梁達還謁行在所渡河取衛輝彰德廣平趙州自
臨清趨德州取長蘆師次直沽獲元海船作浮橋以濟
師使副將軍常遇春都督張興祖各帥師水陸並進元
丞相伊蘇等遁去進克河西務通州元順帝及其后妃
走漠北遂入元都戮其監國淮王特穆爾布哈及左丞
相慶通平章塔爾布斯保賽音布哈右丞相張康伯御
史中丞摩綽等獲諸王子六人封府庫圖籍寶物及諸

故宮殿門以兵守之使宦者護視宮人妃主禁士卒侵暴遣人至京師獻平元表承詔置燕山等六衛守北平分徇保定中山河間真定懷慶皆下西取晉冀澤潞元順帝聞我軍趨關中使庫庫特穆爾出鴈門道保安州經居庸關以攻北平達聞之與諸將謀曰庫庫率師遠出太原必空虛孫都督統六衛之師以鎮北平足禦之矣今乘其不備直趨太原傾其巢穴彼進不得戰退無所依兵法所謂批亢擣虛者也若彼還救太原進退失

利此成禽耳諸將皆曰善乃引兵徑趨太原庫庫特穆爾至保安聞之果還軍救太原乃選精兵夜襲其營庫庫特穆爾遁去遂克太原得兵馬甚衆屯軍石州崞忻霍絳猗氏平陽皆下二年取鹿臺河中關中進克鳳翔議師所向諸將皆曰張思道之才不如李思齊慶陽易於臨洮宜先由幽州取慶陽然後從隴西攻臨洮此萬全計也達曰慶陽城險兵悍未易猝拔臨洮西通番夷北界河湟得其人足備戰鬪得其地足共軍儲今以大

軍威之思齊不西走塞則束手降矣臨洮既克旁郡自下也諸將然之進克隴州秦州趨鞏昌降元平章梁子中等遣右副將軍馮宗異征臨洮李思齊果不戰出降張思道走寧夏而使其弟張良臣守慶陽良臣懼而降達西征平涼良臣復叛達還督諸將攻慶陽拔之盡定陝西太祖賞平中原功達功第一賜白金文幣三年破王巴拜軍定西取興元西平吐蕃略地極西北乃還是冬大封功臣授開國輔運推誠宣力武臣特進光祿大夫右

柱國太傅中書右丞相改封魏國公叅軍國事食祿五
千石賜誥命鐵券賜第京師表其里曰大功坊五年北
征還復命守邊歲鎮北平十七年太陰數犯上將太祖
心惡之召達還京師明年薨追封中山王謚武寧賜塋
鍾山之陰太祖親為製神道碑文命配享太廟塑像功
臣廟位皆第一子輝祖襲封魏國公永樂改元以功臣
子赦不誅卒長女仁孝皇后次代王妃次安王妃

論曰高皇帝起濠滁間創基建康躬親征討惟陳氏耳

餘皆以命將而中山王功最大削楚平吳其次齊魯河洛燕晉秦隴不三四年屢殲元兇雷掃雷驅威敵制勝未有及之者也且不自矜伐恪遵法守位冠元臣世享爵號宜矣

常遇春

常遇春者濠州懷遠人也勇力絕人初屬劉聚乙未聞太祖在和陽棄聚來歸未至困卧田中夢金甲神人呼曰起主君至矣寤而太祖騎從適至即與其徒歸附無

何自請為先鋒太祖曰爾來就食耳若自有主吾弗能留也遇春涕泣堅請太祖曰爾且從渡江俟克太平事我未晚也太祖引兵薄米石磯元軍列陣磯上而磯下多大舟距岸三丈餘莫敢登者遇春乘輕舟繼進太祖麾之使前遇春即奮戈先登元軍披靡遂拔米石乘勝取太平授總管府先鋒進管軍總管丙申元中丞曼濟哈雅復屯兵米石南北路絕而將士多淮西人咸懷內顧太祖命遇春攻破曼濟哈雅軍尋命守溧陽從入建

康功先諸將與徐達克京口授承信校尉領軍先鋒攻
毘陵新軍反圍徐達于牛塘遇春督諸將夾擊大破之
擒其驍將張德進統軍大元帥丁酉克毘陵遷中翼大
元帥與徐達下寧國克馬馱沙攻取池州戊戌進江南
行中書省都督馬步水軍大元帥太祖親征婺州己亥
轉鎮國上將軍同僉書江南等處行樞密院事守婺州
攻下衢州進僉院攻杭州庚子召還京師與徐達攻破
安慶趙普勝水寨陳友諒將攻池州聲言救安慶遇春

策知之乃以羸弱守城伏銳士於九華山友諒果攻池
州伏兵起大敗之友諒既陷太平寇我龍灣復與諸將
設伏破之太祖追襲友諒遇春守京師辛丑拜江南行
中書省叅知政事從取安慶江州還守龍灣張士誠寇
長興遇春往救擊破之長興圍解壬寅羅友賢據池州
神僊寨將與士誠合杭歙震動遇春攻斬友賢餘黨悉
平張士誠遣兵圍劉福通於安豐從攻破之與徐達圍
廬州城將下而友諒寇豫章甚急太祖帥舟師二十萬

討友諒遇春解圍來會友諒即東出彭蠡湖以迎我師
遇之康郎山楚軍乘上流傾國而來其鋒甚銳遇春督
諸將大戰縱火焚偽平章舟風急火熾烟焰蔽天湖水
十里盡赤友諒將張定邊直前搏戰遇春射中定邊走
友諒乃退保鞋山諸將以楚軍尚強請縱其去遇春獨
無言太祖乃命諸將逆流而上列舟蔽江以控湖口凡
十五日楚軍食少突出迎戰遇春復火攻之楚軍潰逐
北數十里戰自辰至未不解太祖所乘舟及遇春舟皆

膠于沙遇春力戰太祖舟乃得脫去而所乘舟復突重
圍以出頃之友諒中流矢貫精及顱而死得士卒十萬
張定邊復立友諒子理于武昌引兵合圍之甲辰理銜
璧出降荆湖皆附進中書平章政事與徐達取廬州略
下臨江之沙坑麻嶺十洞牛陂諸寨攻熊天瑞于贛州
克之徇定南安南雄韶州還取安陸襄陽與徐達攻克
泰州丙午克高郵淮安濠泗徐宿安豐皆下進攻浙西
擒張士誠將尹義于太湖直趨湖州之弁山水陸鏖戰

張軍大潰遂圍湖州偽丞相張士忠悉發境中兵來援
屯於舊館出我師之背遇春將奇兵繞出賊後結營東
阡且填壘溝港絕其歸路士誠知事急親出兵拒鬪勝
之士誠奔還遣其將徐義統赤龍船親軍來援復敗之
烏鎮舊館降將兵六萬徇湖州李伯昇出降湖州下遂
圍姑蘇擒張士誠進中書平章軍國重事封鄂國公拜
為副將軍命與徐達北征中原戊申春正月太祖即皇
帝位進銀青榮祿大夫上柱國兼太子少保攻下山東

諸郡取汴梁進攻河南元軍五萬人陳洛水北遇春單
騎突入其陳敵攢槊刺遇春遇春一發中其前鋒大呼
殺入悉俘其衆河南平渡河取河北諸郡進攻元都克
之下保定中山真定趨太原元庫庫特穆爾帥衆來禦
遇春與徐達謀曰我騎兵雖集而步卒未至不可以戰
莫若選精騎夜劫敵營其衆必亂主將可縛也達從之
庫庫特穆爾果敗遁去進攻大同竹貞棄城走河東下
西入秦張良弼走李思齊降奉先鳳翔鞏昌臨洮皆下

元伊蘓侵通州詔遇春還擊之遂擣永平趨大寧伊蘇遁去攻破開平元順帝北走追至北河獲宗王三人及平章鼎珠等得軍萬人車馬無算還師次柳河川薨贈翊運推誠宣德靖遠功臣開府儀同三司上柱國太保中書右丞相追封開平王謚忠武配享太廟及功臣廟位皆第二子茂襲封鄂國公

論曰開國初忠武常公獨以驍勇著聞友諒地廣兵強勢居上游僭竊閭位彭蠡之役空國而戰可不謂勁乎

而忠武公獨賈勇死戰方其走張定邊脫高皇舟一何壯也高皇帝嘗曰當百萬衆勇敢先登摧鋒陷陣所向披靡莫如遇春信哉

李文忠

李文忠者字思本泗州盱眙人也父禎隴西恭獻王尚曹國長公主生文忠年十二而公主薨隴西公攜文忠走聞太祖在滁陽謁上大喜即收養文忠丁酉以舍人領軍策應池州陳友諒寇池州擊敗之戊戌攻下青陽

石埭太平旌德敗元判院鄂爾和萬年街遂破苗獠于
於潛昌化進次淳安夜襲破偽洪元帥營降其衆千餘
會兵取嚴州授帳前左副都指揮兼領元帥府事守嚴
州張士誠遣將率苗獠水陸奄至大敗之取所俘馘載
巨筏中乘流而下賊見遁去己亥攻下諸暨壬寅苗獠
蔣英賊殺越國公胡大海反據金華文忠馳赴之賊棄
城走擢浙江行中書省左丞癸卯謝再興據諸暨以叛
太祖命築新城於諸暨西以拒之再興誘連張士誠寇

東陽擊破之甲辰陞右丞乙巳士誠復遣偽司徒李伯
昇率衆號二十萬寇新城文忠去新城十里營于龍潭
新城守將胡德濟以衆寡不敵請入城避之文忠曰我
衆非彼敵彼謀非我敵謝玄八千人不破苻堅八十萬
乎乃下令曰彼衆而驕我少而銳以銳當驕一戰可禽
也文忠橫槊據鞍引數千騎乘高馳下直出陣後衝其
中堅手格殺數人出入陣中所向皆靡因督乘之賊大
潰城中將士亦鼓躁而出呼聲動天地斬首數萬生擒

偽同僉韓謙等六百餘甲士三十捷聞高皇帝大喜徵
入賜御衣名馬丙午命總水陸之師進克桐廬新城富
陽餘杭杭州守將潘元明出降文忠入城令曰有敢擅
入民居者斬卒有借民釜者即磔以徇由是內外帖然
得兵三萬糧二十萬就加浙江等處行中書省平章事
洪武元年討平閩寇二年拜偏將軍副開平王常遇春
征進迤北敗江文清於錦川次大寧元將伊蘓逆戰敗
之追至灣河斬其宗王慶生及其將鼎珠進克上都開

平王薨軍中詔文忠領其衆大同受圍急文忠馳救之
師次馬邑元邏騎數十猝至擊敗之擒其將劉平章進
次白楊門擒四大王阻水為營敵乘夜來攻文忠堅壁
不動以二營委之士皆殊死戰比明策其饑疲乃分軍
為左右翼出擊大破之擒其將圖魯卜降其衆萬餘人
進兵至孟格齊不見敵而還三年春授北征左副將軍
總兵北伐出野狐嶺降其守將師察罕諾爾平章珠展
克應昌獲元順帝孫滿達勒巴拉及后妃宮人諸王達

官宋元玉璽金玉冊玉鎮圭大圭玉箠玉斧元太子北
走追之不及而還擒元將江唐國公于中興進攻虹螺
山悉降之師還上平捷表加右柱國大都督府左都督
封曹國公同知軍國事四年蜀平詔文忠鎮撫五年同
中山王征迤北文忠總東道兵取和林師至哈喇莽賚
元師遁文忠曰兵貴神速千里襲人難多重負乃留東
平侯韓政守輜重臚胸河令士卒人持二十日糧兼程
至土刺河元將曼濟哈喇章渡河列騎以待文忠督軍

力戰追奔至稱海敵兵益集乃據險為營示以單弱敵疑有伏遁去軍還失故道乏水渴死者衆至格爾默色所乘馬忽以足跑地泉隨湧出六年出朔州擒元太尉巴延布哈七年詔總兵北伐駐兵代縣遣將四出至賽音布克擒其平章陳安禮瑪蘇繙至順寧陽門者斬其將珍珠律至白登者俘其國公鄧博囉特穆爾復攻大寧高州大石崖克之斬其宗王托多實哩擒承旨伯嘉努召還叅軍國重事兼領國子監事十七年薨于京師

子景隆襲封曹國公

論曰岐陽王以肺腑至親遭際風雲東征西討所向輒克五出漠北克上都破應昌殘元竄匿繫孫子獲名王壯矣哉家居恂恂若儒生賦詩雅歌有祭遵遺風可謂允文允武萬邦為憲者矣

鄧愈

鄧愈者泗州虹縣人也父順興起兵臨濠與元兵戰死長子友隆代領其衆病死衆復推愈年十六出戰必當

先破敵人服其勇乙未率所部歸太祖于滁陽充管軍
總管渡江下采石太平入金陵拔溧水京口所至有功
陞元帥出守廣德長鎗謝元帥來寇廣德愈擊之俘其
總管武世榮及軍士千餘人轉行樞密院判移戍宣州
取休寧績溪乘勝克徽州浙江苗元帥率衆十萬來攻
城愈與胡大海等分門出戰大敗之擊殺元帥特穆爾
布哈斬首五百餘級獲士卒三十餘遂克婺源取嚴州
攻破淳安縣賊金子珍降三十餘人遷同僉樞密院事

尋轉僉院略浙江臨安大敗張軍鎮饒州陳友諒據江
州數遣舟師來攻城愈屢殲其衆除江南行省叅政仍
兼僉院總制諸翼軍馬取浮梁樂平悉定饒地進攻江
西鄧克明據撫州遣使通款而實無降意愈知其情即
卷甲夜趨比旦入其城克明單騎走愈號令嚴秋毫無
犯城中人爭持羊酒迎勞悉謝不受授江西行省叅政
鎮南昌友諒悉發國中兵圍南昌愈固守相持者三月
太祖親征友諒大戰彭蠡湖友諒敗死與開平王合兵

取贛州南安南雄韶州皆下進江西右丞加湖廣行省
平章出鎮襄陽西抵巴蜀北控河洛新附之民未有定
志愈撫以恩信遠邇悅服吳元年擢御史大夫洪武元
年命大將軍經略中原而以愈為征戎將軍攻下唐州
南陽隨州金商均房之境悉定三年拜北征左副將軍
平隴西大敗王巴拜于定西招降河州土番諸酋帥及
朵甘烏思藏等部來歸者甚衆封衛國公五年拜征南
將軍討澧州溪洞蠻平之九年吐蕃部落邀阻烏思藏

使者掠其輜重命愈為征西將軍討之愈分兵為三深入覆其巢追至崑崙山斬獲無算召還道卒追封寧河王謚武順

論曰友諒之順流而東也卷土合圍氣吞豫章頓兵城下者三月寧河王固守以待王師扼其喉咽使友諒進退失據者皆其力也卒之蹶康郎挫彭蠡一發盡殪不有所自哉即其作鎮八州威嚴敵愾恩信得人禮賢下能古名將不能過也

湯和

湯和字鼎臣鳳陽人也幼有奇志與羣兒嬉必習騎射
為戲及長身長七尺個儻多智略元至正壬辰滁陽王
起兵濠州和仗劍率壯士千餘人從之時高皇帝處滁
陽甥館和委心推戴從攻滁州授管軍總管乙未高皇
帝取和州時諸將多滁陽部曲驕不盡禮惟和率所部
聽命甚謹帝甚嘉和陳額森來攻和州擊走之從渡江
下采石取姑孰因分兵取溧水句容丙申從入建業同

中山王取京口陞統兵元帥復同中山王取金壇轉同
僉樞密院事丁酉克常州命和鎮守攻取江陰戊戌張
士誠再寇常州擊却之癸卯大破其軍于陽山拜中書
左丞甲辰遷平章乙巳擊斬江西賊姚大膽遂取永新
州仍守常州吳元年會諸將取姑蘇擒張士誠除御史
大夫兼太子諭德方國珍據溫台慶元三郡和督諸軍
征之國珍懼乘大舶逃海島中遣人諭降之乘勝下福
州洪武元年略定閩中諸郡擒陳友定以歸高皇帝幸

汴梁和扈從同宋國公馮勝取懷慶澤潞晉絳二年同
中山王拔河中入潼關關隴皆平三年襲敗庫庫特穆
爾取寧夏東勝大同宣府封中山侯四年奉詔征偽夏
蜀人鎖瞿唐峽以遏舟師和以計敗之水陸並進遂擣
偽都明昇降五年北征窮追至和林八年移鎮彰德十
年進封信國公同岐陽王練兵鳳陽十一年巡撫西河
州繕完其城十四年北伐下灰山擒平章伯爾克及樞
密副使文通十六年詔往四川永寧治墉濠飭士馬十

八年五開山獠為亂和帥師討之夷其窟穴俘戮四萬人入朝乞骸骨上喜賜第於鳳陽復謂和曰日本小夷數擾東海卿雖老強為朕親視要害地築城戍守和乃築海上數十城民四丁取其一為兵以守之二十一年新第成賜歸鳳陽賞賚甚厚二十八年薨封東甌王追謚襄武

論曰襄武王與高皇帝比肩事滁陽同受寵信乃能識真主知所攀依可謂知矣久鎮常州力抗偽吳使帝無

東顧得專意漢楚功亦不細至于擒士誠降國珍掃閩
定蜀無一不與寵眷彌篤以功名終智矣哉

沐英

沐英字文英鳳陽之定遠人也少孤隨母避兵母病死
無依八歲謁高皇帝于濠陽高皇帝憐而子之賜姓朱
氏年十八授帳前都尉鎮京口稍遷廣信衛指揮使洪
武元年復姓沐氏從東甌王定閩中累陞同知大都督
府事九年乘傳安輯熙河十年副寧河王征番西渡黃

河略川藏耀兵崑崙山轉鬪千里俘獲萬計封西平侯
十一年拜征西將軍征西番平朶甘納琳七站拓地數
千里十三年征和林略額濟訥渡黃河涉流沙偵報去
穹廬五十里乃分軍為四翼銜枚疾走夜薄其營親督
驍勇衝其中堅元國公托果齊等全部皆降十四年出
古北口渡臚朐河獲知院李宣以歸雲南不庭詔拜潁
國公傅友德為征南將軍英為副將軍討之繇辰沅出
羅鬼攻下普定普安元梁王巴咱爾幹爾密遣其平章

達爾瑪以精兵十萬拒我師于曲靖會天大霧冒霧趨白石江敵大驚以為自天而下也賴國欲濟師英曰我軍遠來利在速戰然步卒未集不若以計破之乃陳兵佯若渡者潛遣其兵從下流以濟出其陣後鳴鑼角樹旗幟以疑之陣動英麾軍泅水以渡大戰者良久率鐵騎撞之出而復入生擒達爾瑪俘二萬人梁王走死滇池島中徇下烏撒潞江惟大理不下乃分一軍夜從間道登點蒼山襲其背黎明英擐甲亂流攻破龍尾關進

薄大理城攻破之生擒段世永昌鶴慶會川皆平悉定雲南地詔班師留英鎮守乃辨方物以定其貢賦視民數以均其力役節目疎簡人咸使之麓川緬車里八百媳婦皆內附然夷性反覆數叛輒討平之二十一年平摩和勒斬首千餘級緬思倫發以三十萬衆寇定遠英親將兵三萬討之始戰獲一象殺百餘人英曰吾知賊不足破也下令分軍為三多用火器間以長刀明日大戰乘風縱砲象皆股栗三軍夾擊呼聲震山谷殺其大

將乃斯郎等蠻師大奔斬首三萬級俘萬人獲四十七
象餘盡殪思倫發遂附自是平緬不復反矣二十六年
薨于鎮追封黔寧王謚昭靖子春字景春年十七即隨
英征西番及從征雲南江西順天王賊皆先登襲爵西
平侯鎮雲南數平蠻寇有功在鎮七年闢田至三十萬
餘畝復民戶五千餘鑿鐵池河灌田數萬畝民受其利
春沈毅果敢明識絕倫綽有父風

論曰黔寧王善用兵能以少擊衆方其蹋崑崙踰流沙

焚穹廬即霍衛弗能過也及其殲梁王定雲南作鎮十
年數平蠻夷撫卒伍禮賢者政令寬簡西南晏寧匹美
中山盛矣哉

今獻備遺卷一

欽定四庫全書

今獻備遺卷二

明 項篤壽 撰

劉基

劉基字伯溫括蒼人也元末舉進士授江西高安縣丞
揭文安公曼碩見而奇之寓燕京時書肆有天文書一
帙因盡閱之翼日即背誦如流其人欲以書授基基曰
在吾胸中無事於書也江西行省辟為掾史議事不合
去復為江浙儒學副提舉上書言御史失職事寢不行

遂投劾去嘗遊西湖有異雲起西北光映湖水中時魯道原宇文公諒諸同遊者皆以為慶雲基大言曰此天子氣也應在金陵十年後有王者起其下我當輔之方國珍反省憲復辟為行省都事基建議方氏首亂宜捕而斬之省以基所議請于朝准招安且授國珍以官乃駁基所議行省復以基為行樞密院經歷而經畧使李國鳳奏基有軍功執政者皆右方氏遂置不錄授處州路總督府判乃棄官屏居青田山中著郁離子以自見

人有謂公畫江自守計者基曰吾嘗惡方張輩所為可
身自為之耶及高皇帝下金華定括蒼基指乾象謂所
親曰此天命也遂決計趨金陵而總制官孫炎適以上
命來聘遂間道詣金陵陳時務十八策偽漢陳友諒入
寇或謀以城降之者或謀出據鍾山者或欲決死戰者
基張目不言上召問基曰議降與奔者可斬也如臣之
計莫若傾府庫開至誠以固士心宜伏兵龍灣伺隙擊
之取威制敵以成王業在此舉耳乃用基策乘東風發

伏擊之大敗友諒軍上喜賞基基辭不受元旦中書省設御座將奉小明王行慶賀禮基罵曰牧豎何能為因極陳天命所在上大悟遂定征討之計攻皖城不拔基請徑取江州上悉軍而西友諒走湖廣拔江州上使馮勝攻皖命基授方畧基書片紙授之令夜半出兵至某所見某方青雲起是賊伏也慎勿妄動日中後黑雲漸薄與青雲接者此賊歸也即銜枚躡其後疾擊之可盡擒也驗之果然如基所授計擒賊而還遂拔皖城洪都守

將胡廷瑞使其子約降請禁止諸事上初有難色基自後踢所坐胡床上悟許之廷瑞以洪都降以母富夫人喪辭歸時苗軍反金華括蒼殺守將胡大海孫炎等衢州守將夏毅莫知所為會基至迎入城一夕而定即移書金處屬縣諭以固守遂同諸軍克復處州擒苗帥方國珍素畏基名數遣人致書問基不敢受遣人白上因令基與通問因宣示國家威德國珍遂納土入貢上時時使人以軍國事問基基條答悉中機宜赴京道嚴州

適張軍寇嚴州岐陽王欲奮擊之基使勿擊曰不出三日賊當自走追擊之此成擒耳比三日基登城望曰賊走矣衆見賊壁壘旗幟如故且鼓聲戒嚴疑莫敢輕動基趣使疾進兵至則皆空壘擊鼓者乃所掠老弱耳追至東陽悉擒之基既至金陵時陳友諒據湖廣張士誠據浙西衆欲先取士誠基曰士誠自守賊耳友諒居上流竊偽號宜先伐之陳滅張不足定也時友諒復寇洪都上親征友諒大戰彭蠡湖基密請移軍湖口期以金

木相犯日決勝上從之友諒死荆湖平上還京定計取士誠因定中原拓地西北基密謀居多上或時至基所屏人語移時乃去人莫有聞者拜太史令一日見日中有黑子奏曰東南當失一大將時叅軍胡深伐閩果敗沒他日基見上時方欲刑人基曰何為上語以所夢基曰是衆字頭頭上有血以土傅之得土得衆之象也應在得夢時三日當有報至上乃留所欲刑人三日後海寧以城降捷至上大喜悉以所畱人命基縱之熒惑守

心羣臣皆懼基密奏宜罪己以回天意翌日上臨朝即以基言諭羣臣衆心始安大早上命基讞滯獄平反者甚衆天應時雨上大喜基因奏請宜立法定制從之張士誠既滅張昶欲亂政使人上書頌功德勸及時為樂上示基基曰是欲為趙高也未幾昶以罪誅上嘗以事責丞相李善長憲使凌悅因彈之基言李公舊勲能輯和諸將上曰是數欲害汝汝乃為之地耶汝之忠勲足以任此基叩頭曰易柱必得大木小木為之必將速覆

上怒遂解洪武元年上即皇帝位基密奏立軍衛法拜御史臺中丞中丞章溢奏定處州七縣稅糧如宋制畝悉加五合上特命青田縣止科五合且曰使劉伯溫鄉里子孫世世為美談也上幸鳳陽基居守請曰宋元以來寬縱日久必使紀綱振肅而後惠政可施乃命憲司糾察諸道彈劾無所避基劾中書省都事李彬不法事罪當死而丞相李善長素厚彬請緩其事不聽馳奏行在上從基處彬死刑基承旨斬之上還京師李公愬之

基乃乞歸上問基何言基因奏曰鳳陽雖帝鄉然非建都之地王巴拜雖可取未易輕也後定西失利王巴拜竟走沙漠上手詔敕基勲伐召至京師累欲進基爵基曰陛下天授臣何敢當上欲相楊憲基素善憲以為不可上怪之基曰憲有相才而無相器夫宰相者持心如水以義理為權衡者也今憲不然能無敗乎上曰汪廣洋何如基曰此褊淺觀其人可知胡惟庸何如基曰此小犢耳將償轅而破犁矣上曰吾知無逾先生者基曰

臣疾惡太深又不耐繁劇為之且辜大恩天下何患無才願虛心求之如目前諸人臣誠未見其可也三年授弘文館學士進封誠意伯四年歸老鄉里上嘗以手書問天象事基悉條答大畧言霜雷之後必有陽春今國威已立自宜少濟以寬書奏悉以付史館尋入朝八年疾作命馳驛歸薨于家先是楊憲敗汪廣洋繼之尋貶廣東乃相惟庸基語人曰吾言而驗其如蒼生何遂憂憤成疾死之前數日以天文書授長子璉使上之且戒

勿習復命其仲子璟曰胡惟庸必敗我欲奉遺表亡益他日上必思我如有問當密奏之其畧以為修德省刑祈天永命之本也政之寬猛如循環然諸形勝要害之地宜與京師聲勢相連絡幸聖主留意後胡惟庸敗世以基為知人璉字孟藻仕至江西右叅政有父風

論曰劉公以鴻漸之翼困于燕雀不卑小官其與五就桀者何異既佐真主謀謨幃幄言行計從歡若魚水觀其先楚後吳決成敗於一言定皇業於呼吸真王佐才

也及其功成身退可謂明且哲矣而卒困讒口向非高
皇聖明不亦殆哉詩曰讒人罔極又曰貪人敗類吁可
畏也夫

宋濂

宋濂字景濂金華人母妊七月而生稍長好學極博羣
書從吳貞文公萊習古文辭復從遊柳文肅公貫黃文
獻公潛二公皆當代大儒亟稱濂且自謂勿如也由是
文名震海內至正中執政者薦為翰林國史編修官固

辭入龍門山著書歲庚子高皇帝遣使者樊觀走書幣
徵濂濂曰吾聞大亂極而真人生今其時矣遂應詔與
青田劉基麗水葉琛龍泉章溢入見高皇帝尊禮之語
必稱先生授江南等處儒學提舉奉旨授皇太子經召
講春秋左氏傳濂進曰春秋乃孔子褒善貶惡之書苟
能遵行則賞罰適均天下可定也改起居注上御端門
論黃石公三畧且口釋之濂曰尚書二典三謨帝王大
經大法靡不畢具願留意講明之上曰朕非不知典謨

為治之道但三畧乃時務所先耳嘗論賞賚濂曰得天
下以人心為本上詔丞相李善長歸江西軍中所掠牛
於其民無牛者官給之勿取其租丞相退上顧問濂曰
適所言事當乎濂對曰捐利於民興邦之要也以疾予
告賜金帛皇太子致贈有加上箋皇太子勉以孝友敬
恭進德修業以副天下之望上覽書甚喜召皇太子語
以書意且賜書答洪武二年詔徵濂總修元史除翰林
院學士知制誥兼修國史時甘露屢降上問災祥之故

對曰受命不于天于其人休符不于祥于其仁皇姪文正以荒淫擅殺得罪濂曰文正罪固當死陛下體親親之義生之而置諸遠地則善矣上嘗言古之帝王當晏安之餘多好神仙使國治民安心神怡康即神仙也對曰漢武好神仙而方士至梁武好佛而異僧集使移此心以求賢天下其有不治乎上既追封外王父為楊王立廟京師御通天冠絳袍以祭祭畢上召問大臣朕祭外王父卿等以為不當服袞冕何也濂曰袞冕惟祭天

地宗廟用之餘則當降禮也上嘗祀方丘患心不寧濂
進曰孟軻有言養心莫善於寡慾上稱善三年遷國子
司業四年授安遠縣知縣五年召還授禮部主事遷太
子贊善大夫上問帝王之學何書最要濂請觀真德秀
大學衍義上覽令左右大書揭之兩廡壁諦觀之六年
上御西廡大臣皆侍坐上指衍義中司馬遷論黃老事
命濂講析俾在坐者聽之濂既如詔復進曰漢武好神
仙喜征伐民力既竭嚴刑以震服之臣以為人主能以

義理養心則邪說不能入興學校教民則禍亂無由作矣刑罰非所先也上嘗語濂曰朕為君上畏天地下畏兆民兢兢業業不敢自逸濂對曰陛下此心古先哲王之心也願慎終始如始天下幸甚上御齋室問三代歷數封疆修短廣狹濂歷言之且曰三代之治天下也以仁義故歷年多後世莫及進翰林侍講學士奉詔作辯姦錄祖訓成命濂序之上稱善嘗侍上後苑觀穫上曰農事成矣濂曰國以民為本民以食為先陛下念稼穡之

艱難實盛德也上嘗問曰三代以上所讀何書對曰上古載籍未立人尚躬行君人者兼治教之責躬行以率之天下有弗化者乎詔纂修大明日厯一百卷擇其大者為寶訓五卷濂總裁其事朝夕禁中濂在朝久凡郊社宗廟山川百神之典朝享宴慶禮樂律厯衣冠之制四夷朝貢賞賚之儀及勲臣名卿功德之文承上意旨論次紀述咸可傳於後世在上前所陳說必以誠即問家事亦一一道之上嘗問濂昨日飲酒否坐客誰有羞

何物悉以其人及肴饌對上笑曰朕潛使人視卿卿真不欺益親信濂欲使叅大政濂辭曰臣少無他長惟知文墨不願居職任也上愈厚之每燕見必命茶賜坐每旦令侍膳詢訪舊章講求政理或夜分乃退召問廷臣臧否第言其善者復問否者為誰濂曰其善者與臣交臣故知之其否者縱有之臣不知也卒無所毀或命賦詩為文必寓忠告奉制詠雁七步而成有自古戒禽荒之語上曰卿可謂善諫矣濂畏慎凡禁中語絕不以語

人署溫樹二字於所居之壁有以禁中事問者即指以示之上嘗與濂飲濂辭強之至三觴面如赭行不成步上大歡笑御製楚辭一章以賜命侍臣咸賦醉學士歌且曰使後世知朕君臣同樂若此也甘露降上召濂賜坐乃躬執金杓煉湯於鼎以甘露投之手注于卮以賜濂曰此和氣所凝能愈疾延年故與卿共之耳九年拜翰林學士上謂濂曰朕以布衣為天子卿亦起草萊列侍從為開國文臣之首使世世與國同休不亦美乎詔徵

濂孫慎為殿廷儀禮司序班尋拜中子璲為中書舍人
上時試璲與慎而訓戒之上笑語濂曰卿為朕教太子
諸王朕為卿教子孫濂頓首謝濂或奏事久稱倦上命
璲與慎共掖扶下殿三世官內廷人以為榮復以行步
艱詔皇太子選良馬以賜上親作良馬歌詔羣臣和之時
有上疏萬餘言者上厭其迂答之而怒未解召問濂濂
曰彼應詔言事其心忠耳惡可深罪乎上默然上嘗廷
譽濂曰古之人太上為聖其次為賢其次為君子若宋

景濂者事朕十有九年未嘗有一言之偽誚一人之短
寵辱不驚始終無異其君子者乎非止君子抑可謂賢
矣十年冬致仕將歸賜御製文集及綺帛上曰朕最慎
賞嘉卿忠誠可貫金石故以是賜卿卿今年幾何矣對
曰六十有八上曰藏此綺候三十二年後作百歲衣也
濂叩首謝至家拜表稱謝上箋皇太子論正心治國之
要上賜詔褒答焉初濂辭歸請歲一來朝明年秋入朝
上佇想已久廷問者數矣及至大喜皇太子諸王皆動

色相賀上降勅符遣儀曹賜醪膳諸物日侍上遊歷觀
闕盤旋禁籞侍食便殿日晏始退上嘆曰純臣哉爾濂
方今四夷皆知卿名卿其自愛濂避謝不敢當歲暮辭
歸復遣中貴人賜上尊既行數日上語遂曰朕疇昔之
夜夢見爾父笑談如平生爾父雖去其容儀儼然在朕
目中也遂謝曰非陛下過念臣父何以形諸夢寐濂方
入朝朝之百執事惟恐濂之弗留也下至寺人衛卒咸
以手加額相推排迎拜爭先覩濂蠻夷朝貢者數問濂

安否高句麗安南使者至購濂文集日本得潛溪集刻板國中其使者奉勅請文以百金為獻弗受上以問濂對曰天朝侍從之官而受小夷金非所以崇國體也上深然之濂于學無不窺而尤以篤行為尚嘗曰古之學者使心正身修措之行事俯仰無愧而已繁辭複說道之蔽也篤於人倫好接引後學惟恐弗及遠方來者授館而飲食之久而不厭遇人拜雖三尺童子必屈膝以答至王公貴人曾不少降一候其門朝廷有大議援古

今辯說侃侃不回平居布衣蔬食無異貧士不事產業
自少至老手不廢書及歸青蘿山閉戶纂述人罕窺其
面視近甚明能一黍上作十餘字十三年以慎獲罪安
置茂州卒於夔所著有潛溪集四十卷蘿山集五卷龍
門子三卷浦陽人物記二卷翰苑集四十卷芝園集四
十卷行于世澤濂之孫也建文君即位念濂舊學召澤
復官翰林而濂之門人樓璉鄭楷皆見擢用

論曰夫謂天道福善禍淫豈不信哉而有否者謂天之

未定非耶故蓋臣貞士碩輔鴻儒砥德樹行明道立言
其至也當與日月並曜金石同堅而或乃蒙投杼之疑
受蜂蠆之螫髡首剖肝引頸齒劍亦或隱山被焚懷沙
自溺赭衣胥靡囊頭圜棘瑣尾流離或竄或黜不幸甚
矣而耿光懿烈垂範不磨流丹青之譽而享俎豆之封
亦或慶流後人俾昌俾熾至于乘軒析壁之雄管喉舌
而專紱冕吐嗽雲雨噓吸霜露攫金道途下石機穽自
謂一世之榮而燭滅澌散者孰與較得失哉宋公隱居

龍川究天人之蘊邈濂洛之宗博綜丘墳考槃飲泌終
其身不悔矣一旦當締構之運遭龍虎之期乃始敷闡
大猷贊襄休治優游禁近非堯舜之道不陳非湯武之
事不道諷不失正語必施行卒之潤色鴻業使禮樂文
章炳與三代同風焯乎稱偉烈矣跡其褒許隆重寵冠
羣臣不為不遇而知幾秉哲勇退急流即大雅君子何
可得過乃竟罹註誤擯死遐陬生鮮剖符之榮死歎首
丘之願天之未定顧不信耶

李善長

李善長濠州定遠人至正甲午高皇帝南畧滁陽善長伏
謁上以其長者禮之問曰戰鬪紛紛何時定乎善長對
曰昔秦失其政四方蚤涌漢高起自布衣提三尺劍不
五載而稱帝由豁達大度知人善使故也今元運丁百
六倫紀隳斁法理蠹廢賦調繁重視秦為烈羣雄蝟起
天厭其德非人力也主公產於濠城距沛不遠山川王
氣與漢高同能法漢高天下不足定也上曰漢高用三

傑今徐達勇略或可方韓信張良蕭何先生可當之乎
善長對曰張良後世鮮倫善長何敢望若何之供給餽
餉或可勉耳上曰古張良不可得今可為張良者先生
幸以教孤對曰今天下才智之士甚衆不能悉知所知
者惟金華宋濂博學且知象緯上曰以孤所聞知象緯
者無如青田劉基善長曰雅聞其名宜悉招致之上大
悅留置幕下俾掌書記贊畫軍機饋餉甚見親信上謀
取和陽謂善長曰滁院隘山不通舟楫且無形勢可據

非用武地欲圖和陽可乎善長對曰和城兵無紀律師
一臨即下然亦非用武地欲圖大業非金陵不可上曰
善上嘗從容語善長曰方今羣雄並爭非智者不可與
謀吾觀羣雄中用事者多短毀將士將士弗得效其能
汝宜協和諸將毋効彼所為也滁陽王欲拔善長置麾
下善長弗肯往涕泣訴于上諭曰主帥之命不可違也
善長終不肯往乙未和陽既下滁陽王命上總和陽兵
諸將多不悅賴善長調護得安上嘗出擊鷄籠山寨元

兵寇和陽善長督兵敗之殺獲甚衆久之上謀渡江無
舟巢湖俞通海等以舟師來附上甚喜善長曰此天意
也願急渡江六月朔上遂渡江拔采石乘勝取太平上
之發采石也令善長為戒戢軍士榜入太平即張之初
士卒欲肆剽掠見榜揭通衢皆愕然不敢動城中肅然
拜善長元帥府都事丙申三月從克建康上欲取京口
患諸將縱士卒暴橫為民害召而數之欲寘之法善長
力救乃免七月善長等奉上為吳國公乃拜善長為行

省叅議時江右草創命將四征善長傳供給億軍無乏
食戊戌上征婺州善長留守庚子友諒僭號約張士誠
共侵建康上與康茂才謀速友諒茂才曰吾家有老閭
當事友諒令齎書往約為內應友諒信之必速來以問
善長善長曰方以賊來為憂奈何速之上曰使二賊合
吾何以支先破此賊士誠膽落矣善長曰善乃遣老閭
老閭進書友諒甚喜問康公何在曰今守江東橋又問
橋何如曰木橋也乃遣還曰吾當即至至則呼老康為

號老閹還具以告善長乃以鐵石易江東橋一夕而成
友諒至見非木橋呼老康無有應者惶遽還走伏發大
敗之友諒僅以身免降其將張志雄等辛丑善長議立
鹽法錢法茶法上皆從之以善長兼大都督府司馬事
尋叅中書省事上親征江州及大戰彭蠡取武昌善長
皆留守甲辰奉上為吳王陞右相國偽漢滅建議立康
山忠臣廟報死事者已承詔歸江西軍中所掠牛於
民無者官給之建議江西湖廣魚課歲可得穀一百餘

萬石上從之李濟據潯州上命善長為書招之濟遂降
吳元年六月率羣臣勸上即皇帝位不許善長等力請
曰殿下起潯梁不階尺土遂成大業四方羣雄剗削殆
盡人肯歸心願早正位號以慰羣望上猶未許時刑獄
太繁善長奏宜欽恤無更連坐上可其奏九月姑蘇破
執張士誠送建康論功封宣國公尋命百官禮儀俱尚
左改善長左相國命中書省定律令以善長為總裁官
議取中原及福建廣西十二月善長復率羣臣奉表勸

進復至再三乃率禮官以即位禮儀進明年戊申正月
乙亥上祭告帝祇于南郊即皇帝位于郊壇南定有天
下之號曰大明建元洪武善長率羣臣及都城父老拜
舞上還御奉天殿善長率百官上表賀上命善長奉冊
寶立皇后及皇太子進上柱國錄軍國重事尋兼太子
少師二月善長率禮官進園丘方丘宗廟社稷議各具
沿革以進詔大將軍徐達等北伐中原命善長祭告江
河漢濟然後出師五月上幸汴梁善長留守軍國事皆

決馬駕還善長奏定六部官制十二月定官民喪服之制及三司朝賀東宮儀二年正月承制立功臣廟於鷄籠山定太歲風雲雷雨嶽鎮海瀆山川城隍諸神祭禮及翰林院官制二月命善長監修元史奉詔立皇陵碑四月奉詔編祖訓錄定封建諸王國邑及官屬之制八月定大祀受誓戒十二月議賞平定中原功三年正月議北征沙漠三月議定朝臣服色四月定官民書禮儀式禁民間名字毋得犯先聖先賢大國君臣及漢晉唐

宋國號議置司農司於河南從善長議也五月承制給存恤祿於武官陣亡物故無子孫而有父母及妻者六月奏禁淫犯及僧道師巫諸邪術詔從之議定文武官朝服之制七月元史成賜善長綺帛左丞楊憲恃寵專恣挾私忿劾奏右丞相汪廣洋陰事善長怒奏憲上命羣臣按治憲伏誅進封韓國公禮部尚書陶凱請專選東宮官罷善長等兼職上曰古者官不必備惟其人朕以廷臣有才望勲德者兼東宮官非亡謂也嘗慮廷臣與

宮寮不合遂成嫌隙或生奸謀離間骨肉其禍非細江
充之事可為明鑑朕今立此兼職父子一體君臣一心
庶無相構之患也四年善長乞致仕許之賜臨濠地若
千頃守墳人及佃戶詔董建臨濠宮殿七年上謂善長
曰濠吾故鄉兵革之後人少田荒乃移江南民十有四
萬于濠命官監墾田畝以善長總之十三年正月胡惟
庸謀逆事覺辭連善長羣臣請併罪善長上曰此吾初
起時股肱心腹也不忍罪之其勿問五月復命善長理

臺事十四年議征漠北及雲南奉詔定封贈蔭叙之例
二十三年五月星變其占為大臣災未幾善長薨長子
祺尚臨安公主

論曰高皇帝之趨彭蠡也西畏強楚東逼勁吳謀臣猛
將空國以爭死敵建康草創人無固志岌岌乎殆哉李
公一書生固守根本晏然無虞此與蕭相國何異東征
西討給饋餉繕器械未嘗乏絕和輯諸將一心同力以
贊王業其所奏定法制綱目細可繼可傳若李公者

孰能使無聞哉

陶安

陶安字主敬太平當塗人也元末舉浙江鄉試授明道書院山長調高節書院避亂家居高皇帝渡江取太平安與李習等出迎安見上狀貌謂習等曰龍姿鳳質非常人也今有主矣上召安與語時事安因獻言曰方今四海鼎沸豪傑竝爭攻城屠邑互相雄長然其志皆在子女玉帛非有撥亂救民之心明公率衆渡江神武不

殺人心悅服以此順天應人天下不足平也上曰足下
言善吾欲取金陵何如安曰金陵龍蟠虎踞限以長江
據其形勝以臨四方何向不克上大喜授安元帥府令
史從克金陵轉行省都事拜左司員外郎陞郎中上既
得劉基宋濂章溢葉琛四人因問安四人者何如對曰
臣謀略不及劉基學問不如宋濂治才不如章溢葉琛
上多其善讓克武昌命安知黃州改桐城令移知饒州
時方征伐急軍需安勸諭其民民皆樂輸信州盜蕭明

攻饒安率吏民拒守援兵至賊敗走諸將以鄉民多從賊欲屠之安曰為賊所脇耳奈何殺之由是民皆得全上嘉其功賜詩褒美安入朝饒人歌之曰千里榛蕪侯來之初萬姓耕闢侯去之日既而復守饒州饒人復歌之曰湖水悠悠侯澤之流湖水有塞我思侯德建生祠尸祝之吳元年初置翰林院首召安為學士時方召四方宿儒集闕下議禮命總之詔修律令安為議律官洪武元年安與劉基言於上曰聞將倣元制設中書令以

太子為之上言取法於古必擇其善者而從之元制豈足法太子宜尊禮師傅博通古今他日軍國重務皆令啓聞何必效彼作中書令乎因選大臣勲德者兼東宮官職上嘗御東閣安與章溢等侍因論前代興亡上曰喪亂之源由於驕佚今聞卿等論此豈不信與上與儒臣論學術安對曰道之不明邪說害之也上曰邪說不去則正道不興天下烏得而治安曰陛下所言深探其本安與省臣李善長等進郊社宗廟議請分祭天地於

南北郊冬至祀上帝於圜丘以大明夜明星辰太歲從祀夏至祀地祇於方丘以嶽鎮海瀆從祀宗廟則四代各為一廟皆南向以四孟及歲除凡五享孟春特祭於太廟孟夏孟秋孟冬歲除則合祭於高祖廟社稷宜祭以仲春仲秋上戊日皆從之安復奏古者天子大社必受霜露風雨以達天地之氣若亡國之社則屋之不受天陽也今創屋非禮若祭而遇風雨則於齋宮望祭上是之復奏議冕服之制凡國家制度禮文多安所定擬

上嘗製對賜安曰國朝謀畧無雙士翰苑文章第一家
時有御史言安隱過上曰朕素知安安寧有此且爾何
由知之對曰聞之道路上曰御史但取道路言毀譽人
邪命黜御史尋拜安江西行省叅政卒于官安博學尤
精於易筮驗如神所著有文集若干卷行于世

論曰高皇渡江三吳豪傑未有至者而安獨首先謁所
言皆大計卒之定基金陵弔伐之師遠過湯武安言悉
驗非王佐才能之乎尚論其世亦劉宋之儔也

章溢

章溢字三益處州龍泉人從王叔剛游講正心修身之學浙東憲使圖沁布哈請與語悅之改官陝西要溢與俱至武林忽心悸辭歸父病已革八日而逝人以為純孝所感至正間蘄黃妖賊犯龍泉溢從子存仁為賊所執溢詣賊請代賊聞溢名得溢大喜就問計策溢正色拒之曰若等皆有父母妻子獨不畏族滅邪賊怒繫脅之降溢曰死即死不為不義賊壯之不敢加害乘夜紿

守者脫歸集民兵擊走之數從舒穆魯宜孫平寇有功授
龍泉縣主簿不受復累戰功陞松陽縣尹福建行省檢
校僉浙東都元帥事皆辭不受結廬匡山避入閩高皇
遣使聘溢與劉基葉琛宋濂同至建業上問勞曰我為
天下屈四先生四海紛紛何時定乎對曰天道無常惟
德是輔惟不嗜殺人者能一之上曰卿等其留輔予擢
僉營田司事巡行江東兩淮田之荒蕪及耕墾者皆分
籍之定其賦役溢久病在告上以問都事張來碩對曰

溢日夜念母不置主上遇之厚不敢言歸成疾耳即日
命溢歸省浙東始設按察司拜僉事尋改湖廣建議荆
襄多曠地宜分兵屯田且以控制北方上深善之按察
使宋思顏孔克仁僉事王璫先後以事逮獄辭連溢溢
憂懼上遣劉基喻曰素知章溢守法勿疑也胡深敗沒
處州煽動陞溢浙東按察副使往鎮之溢辭曰臣前任
浙東亡狀同列皆獲罪而臣獨蒙宥今若加擢益重臣
過上重違其志命仍僉司事比至賊寇慶元龍泉時官

軍盡戍浦城城中軍少濫召舊所部義兵使據要害賊不敢犯戍浦城者乏食上以屬濫暨行省右丞李文忠文忠欲運處州糧以餉之濫曰今舟車不通軍中所掠糧甚多請拘入官均給之建寧守將阮德柔遣使納款人以為詐濫曰陳友定據全閩勢必不能容故德柔為自全計非詐也具以聞詔許之而德柔已為友定所併濫因留其使厚恤之中書省命處州造海船并僉溪船戶一十為水軍既有領之者復隸軍府濫奏設水軍千

戶所以專統之處多山少田軍需不足胡深為奏免雜
稅而行省復有所科奏罷之浙西諸郡皆平上召溢且
命分兵取閩中而以其子存道守處州溢入見上諭羣
臣曰章溢雖儒臣父子宣力一方寇盜盡平其功誠不
在諸將後問征閩諸將何如溢對曰御史大夫湯和由
海道進平章胡廷瑞自江西入此固必勝然閩中尤服
李文忠信若令文忠從浦城取建寧此萬全計也即日
詔文忠出師如溢策處州糧舊額一萬餘軍興加十倍

民不堪命溢言之丞相丞相入奏詔從其舊洪武元年
拜御史中丞兼太子贊善大夫溢務大體不屑屑細故
或以為言溢曰憲臺百司之儀表居是職者當先養人
廉恥使人不犯豈直恃搏擊哉上親祀社稷會大風雨
還坐外朝怒儀曹議禮不合以致天變將殺之溢奏曰
風雨連朝無怪者縱禮官議有未盡陛下誠自足以
格神明願寬雷霆之怒上為霽威存道部鄉兵萬五千
從李文忠入閩閩平詔存道以所部從海道北征溢持

不可曰鄉兵農人耳始令征閩許以事平歸農今復調之是不信也上不憚而罷濫繼奏曰兵已征閩者放歸農其昔嘗叛逆者宜藉為軍使北征一舉而恩威著矣上喜曰孰謂儒者果迂闊哉第為一行可成茲事濫受詔即行會母艱馳歸乞守制不許濫洒泣治戎事鄉兵既集命存道部領由永嘉浮海北行章再上乞終喪詔可其奏哀毀卒于家

論曰章公一儒者提戈躍馬掃清妖氛牧民馭衆之才

兼資文武立臺端振肅綱紀表儀百僚務存大體可謂
正直忠厚者矣

今獻備遺卷二

欽定四庫全書

今獻備遺卷三

明 項篤壽 撰

傳友德

傳友德者宿州人徙居碭山元末從李喜之起兵山東既歸明玉珍不能用乃率所部走武昌從陳友諒辛丑上攻江州至小孤友德率衆降上使將兵從常遇春攻廬州友諒圍洪都從上親征大戰彭蠡友德以樓船犯其前鋒身被數創戰益力殺數百人復與諸將邀擊江

口友諒死復從上親征武昌督兵攻城城東南有山名高冠下瞰城中上問諸將誰能奪此山者友德即率萬人先登一鼓奪之矢中面及脇下鏃出腦後不顧武昌平以功擢雄武衛指揮使與徐達攻拔廬州取夷陵衡州襄陽攻安陸身被九創擒其守將任亮取淮東泰州進攻淮安破張軍于馬騾港大破竹貞兵于安豐所過焚元積聚吳元年守徐州王巴拜遣驍將李貳來寇伺其出掠乃將步騎二千沂呂梁搶舟登陸擊之賊將韓

乙迎戰友德躍馬奮槊刺乙墜馬賊敗走友德度李貳
必益兵來鬪趨還城開門出兵陣于城下令士卒卧鎗
以待聞鼓聲即起擊有頃李貳果至友德鳴鼓士皆奮
起鬪賊大敗生禽李貳獻俘京師上勞賞之拜江淮行
省叅政大將軍徐達等北征中原上諭之曰征伐奉天
命平禍亂安生民叅政傳友德勇畧冠諸軍可領一軍
使獨當一面復諭友德曰此行當努力今用師自山東
始汝其勉之進攻沂州斬王宣下青州敗元將伊蘓兵

取萊陽洪武元年取東昌棣州樂安攻克汴梁河南洛陽及諸山寨闕陝平上命取元都友德引兵渡河取衛輝彰德遂下廣平克臨清德州滄州通州進克元都復將兵偵邏古北諸隘口追元殘兵所獲輜重無算略大同而還徇下保定中山真定略平定州遂克太原初庫庫特穆爾自太原出鴈門將由居庸以攻北平友德同大將軍等乘虛徑擣太原擴廓至保安州聞之還師來援其鋒甚銳萬騎突至友德帥敢死士擊却之因夜伏

兵襲其營庫庫方明燭坐帳中聞變遁去友德追至土門關不及而還獲甲士四萬餘敗元將賀宗哲於石州擊走四大王及竹貞兵敗圖魯卜于宣府同大將軍取陝西下鳳翔鞏昌臨洮攻克慶陽陝西悉平三年復命友德同大將軍等出潼關以擣定西敗王巴拜兵巴拜北遁乘勝取蜀友德為前鋒出秦州奪略陽關擒偽夏平章蔡琳遂入沔州分兵由鳳翔入連雲棧合攻漢中克之尋以餽運不繼還軍西安夏將吳友仁寇漢中守

將金興旺遣人來救友德率精銳三千攻斗山寨下令
人持十炬燃于山上友仁軍望見列炬起大驚夜遁去
大封功臣封潁川侯是年冬命將分道伐蜀湯和廖永
忠等由瞿塘趨重慶拜友德為征西前將軍由秦隴趨
成都上密諭友德曰蜀人聞西伐必悉精銳東守瞿塘
北阻金牛以拒我師若出其意外直搗階文門戶既隳
腹心自潰矣友德受命馳至陝集諸道兵揚言出金牛
潛使人覘階文守備單弱引兵出陳倉攀緣山谷晝夜

兼行直抵階州守將丁世珍率衆拒戰擊走之克階州
遂趨文州蜀人斷白龍江橋以阻我師友德督兵修橋
以渡破五里關拔文州渡青川杲陽白水江蜀人望風
驚遁遣人諭降之引兵趨綿州阻漢江不得渡下令軍
中造戰艦百餘艘以濟師欲以軍信達湯和而山川懸
隔適江水暴漲乃以木牌數千書克階文綿州日月投
漢江順流而下蜀守者見之咸解體尋拔漢州初夏人
聞王師伐蜀命丞相戴壽太尉吳友仁等悉衆守瞿塘

及聞友德破階文乃分兵還援漢州以保成都未至而友德已逼漢州向大亨悉兵出戰城下擊敗之壽等至友德下令曰彼勞困遠來聞大亨敗衆必洶洶可一戰禽也乃親督兵迎擊壽壽大敗遂拔其城是時湯和駐兵大溪口未進上引友德冒險克敵功責之而和亦得木牌於江流遂進師趨夔州友德進圍成都戴壽向大亨等出城戰以象載甲士列于陣前友德命以弓矢火器攻之象中矢却走壽兵躡藉死者甚衆友德亦中流

矢會湯和遣人報重慶之捷壽等遂無鬪志乃降分兵
徇下州縣之未附者克保寧執吳友仁械送京師蜀地
悉平師還論功御製平蜀文以旌之五年副征西將軍
馮勝北征沙漠敗實喇罕于西涼至永昌敗多爾濟巴勒
攻甘肅射死平章布哈降太尉瑣納住等六年大軍復
出鴈門西北巡長城外友德為前鋒敵遠遁追獲平章
鄧博囉特穆爾軍還留鎮北平上疏陳五事上嘉納之
召還從皇太子諸王講武荆山下九年屯兵延安以備

巴延特穆爾設伏大破之其麾下縛巴延特穆爾以降
上將平雲南命友德巡行川蜀永寧雅播等處修城郭
治闕梁於是金筑普定諸山寨酋長相率來降十四年
同大將軍出塞討元平章魯爾布哈等渡北河敵騎遁
友德選輕騎夜襲灰山克之九月拜征南將軍藍玉沐
英副之統兵三十萬征雲南上諭之曰朕覽輿圖取之
之計當自永寧先遣驍將別率一軍向烏撒大軍宜自
辰沅入普定分據要害乃進兵曲靖雲南之喉襟彼必

併力以拒我師出奇取勝正在於此既下曲靖三將軍
以一人提勁兵趨烏撒應永寧之師大軍直搗雲南彼
此牽制疲於奔命破之必矣雲南既克宜分兵徑趨大
理勢將瓦解其餘部落可遣人招諭不煩兵也友德至
湖廣分遣都督胡海等率輕兵五萬由永寧趨烏撒大
軍由辰沅趨貴州攻普定普安下之進取曲靖梁王巴
咱爾幹爾密遣平章達爾瑪將精兵十餘萬拒我師友
德用沐英計倍道疾趨未至曲靖數里忽大霧冒霧至

白石江頃之霧霽敵大驚我師陽渡江而潛遣數千人
從下流以渡出其後遍樹旗鼓達爾瑪急撤軍禦而我
師畢濟矣友德麾兵大戰矢石齊發聲震天地縱鐵騎
擣之敵大敗生禽達爾瑪俘其衆萬計悉縱使歸本業
遂平曲靖友德自將兵擊烏撒城之分遣副將軍下雲
南梁王走死通畢節克可渡河於是東川烏蒙芒部諸
蠻皆震讙降附進克大理禽土酋段世分兵略下鶴慶
麗江金齒車里平緬皆降烏撒蠻復叛討破之復遣兵

搜捕蠻黨未服者霑翠欵附蠻地悉平上數遣使勅勞友德十六年上命長興侯耿炳文往諭友德等班師友德乃因其土俗定賦稅廣屯田興學校創設諸司邊境以寧十七年凱還進封潁國公十九年再征雲南二十二年復統番漢軍討曲靖普安等處蠻平之二十三年征沙漠至迤都山禽羅爾布哈復征西路寧夏二十四年北征追故元遼王方進兵遽下令班師敵信之少懈趣師深入掩襲其衆而還

論曰明興猛將雲從六王最著以驍力稱者莫如常開
平次傅穎國耳觀其下蜀掃滇踰險隘涉荒遠席卷颶
馳功甚奇偉而用兵方略悉稟朝算有以哉

廖永忠

廖永忠者巢縣人楚國公永安弟也乙未永安與俞通
海等以舟師迎高皇帝於巢湖永忠年少高皇帝曰汝
亦欲圖富貴乎永忠對曰得事明主効展尺寸是所願
也上大悅即以水軍屬永安而永忠副之從渡江定金

陵取鎮江常州池州及江陰宜興累戰皆先登有功戊戌永安陷於張軍永忠代總其兵授樞密僉院己亥攻破雙刀趙克復縱陽庚子同張德勝等大敗陳友諒於龍江陞同知樞密院事辛丑從上伐友諒攻安慶破其水寨長驅入江州分兵攻下瑞州臨吉諸郡壬寅從取南昌癸卯攻廬州未下而友諒圍南昌甚急七月從上討友諒於彭蠡丁亥遇之康郎山戊子大戰徐達敗其前鋒永忠與俞通海等縱火焚賊舟而賊之驍將張定邊

者直前犯上舟常遇春射走之永忠即以飛舸追定邊
定邊走身中百餘矢士卒多死傷日暮收軍己丑復大
戰以七舟載葦荻乘風縱火焚賊數百艘烟焰漲天湖
水盡赤又明日庚寅永忠通海等以六舟深入搏戰賊
聯大艦以拒我師望六舟無所見意已陷沒頃之六舟
旋繞敵船而出我師見之勇氣百倍合戰益力聲動天
地湖水起立賊大敗相持者逾月友諒移軍湖口欲遁
走永忠督諸將橫截湖面邀其歸路友諒敗死上還建

康論功賜永忠硃牌鏤金字八曰功超羣將智邁雄師
甲辰武昌平以功陞湖廣行省左丞從攻廬州克之救
安豐取江西未下州郡乙巳與徐達等攻下泰州丙午
克高郵淮安從伐張士誠吳元年以平吳功進中書平
章政事十一月拜征南副將軍會湯和討方谷珍降之
遂自明州出海道取福州洪武元年以平章兼同知詹
事院事攻破延平禽陳友定閩地悉平二月拜征南將
軍同朱亮祖由海道取廣東遣人以書諭降元丞相何

真潮廣循惠悉附攻破偽叅政邵宗愚山寨諸郡皆下
九真日南朱崖儋耳三十餘城皆傳檄而定遂進取廣
西六月師入梧州至九月悉定廣西二年凱還上命皇
太子率百官迎於龍灣入見上撫慰懽甚復命皇太子
送永忠還第賜予甚厚三年封德慶侯尋拜征西副將
軍同湯和伐蜀四年克歸州進攻瞿塘以山峻水急蜀
人以鐵索飛橋橫據關口我舟不得進乃密遣壯士數
百人舁小舟踰山度關出其上流人持糗糧水筒以禦

饑渴蜀山多草木令將士皆衣青蓑魚貫出崖石間蜀人不覺也度已至夜率精銳出墨葉渡分兩道一軍攻其陸寨一軍攻其水寨水軍皆以鐵裹頭船置火器而前比明蜀人來拒已破其陸寨矣頃之所遣將士舁舟出上流者一時俱發揚旗鼓譟而下蜀人出不意大駭而下流之師亦擁舟前進發火炮火筒夾擊之賊大敗走焚三橋斷其橫江鐵索禽斬無算永忠入夔府明日湯和兵亦至分道並進和率步騎而永忠率舟師乘勝

抵重慶次銅鑼峽明昇遣使納款永忠以湯和未至不受和至明昇面縛銜璧出降和受璧永忠解縛承制撫慰下令禁侵掠遣使獻俘京師蜀地平凱還論功詔曰德慶侯廖永忠破瞿塘下重慶功最大賞白金文綺賜第京師洪武八年卒初捷聞上親製平蜀文第其功曰傳一廖二復命劉基作平蜀頌以旌之

論曰德慶侯兄弟從龍渡江首基王業而楚公獨困于豫且惜哉方彭蠡之戰也流血為湖僵屍成丘而永忠

以六舟搏其千艘出沒洪濤輕捷若飛矢石雨下而意
氣彌厲竟翦修鯨功冠諸將功亦奇矣滅吳掃閩席卷
五嶺及破瞿塘擣重慶智勇俱奮功齊穎國非至驍俊
疇克爾哉明昇之壁降也俟湯公至方始受之從容推
讓有足多者竟以小青蘄列上公惜哉

俞通海

俞通海字碧泉巢人江淮賊起父子結寨巢湖自守通
海聞上駐和陽歸款雙刀趙謀劫上通海密白上挾兵

歸營曼濟哈雅陳兆先之戰皆敗其衆攻鎮江常州宣城敗吳呂珍進兵吳江中流矢右目失明再破雙刀趙復池州陞僉書樞密院事從征友諒克銅陵搗九江掠蘄黃擊祝宗復南昌上率通海等西援友諒解圍東出鄱陽湖通海乘風火焚其舟率飛舸射中張定邊友諒死陞中書省平章政事總兵略劉家港平廬州攝江淮行中書省事從征浙西克湖州轉戰至滅渡橋中流矢卒贈豫國公改號國公諡忠烈侑享太廟

張德勝

張德勝合肥人集衆結水寨以舟師來歸至和陽營于
新河授萬戶渡江拔采石取太平擒陳頤森擢管軍總
管曼濟哈雅陳兆先復屯方山同太平公破之從取集
慶大破方山營擒兆先克鎮江下常州宣州宜興普勝
陷池州擊敗其柵于江口復池州友諒犯龍江德勝呼
諸軍力戰敗走友諒降其將張志雄梁鉉喻國興劉世
衍追友諒至采石戰歿贈蔡國公諡忠毅侑享太廟

趙德勝

趙德勝鳳陽人因母在滁陽軍中棄妻子來歸太祖為
帳前先鋒從克和陽儀真敗方山營苗軍水寨收丹陽
金壇廣德宣城戰毘陵湖州擢左副元帥伏友諒龍江
下銅陵臨山寨出淮南征高郵從破漢水寨走友諒收
黃梅廣濟克瑞臨吉撫四郡旋廕安慶降南昌南昌叛
從復南昌臨江吉撫三城叛又復三城癸卯漢圍南昌
公出戰射殺漢金指揮漢益急攻城且壞德勝先諸將

死戰且戰且築城城壞復完巡城至東門敵發蹶張弩
中腰脅箭深入六寸即拔出拊髀歎曰命也奈何卒友
諒滅贈梁國公侑享太廟謚武桓

耿再成

耿再成五河人癸巳來歸從征授百戶立功泗滁和陽
建康鎮江陞元帥守鎮江克揚州改守揚州宜興數被
吳寇又改守宜興尋還守揚州取處州又改守處州先
是士卒徵私粟民間號若糧民苦公白胡叅政盡罷若

金史卷之三
糧壬寅苗帥叛公方與客飲聞變上馬收戰卒不滿二十人迎賊罵曰爾衆俘國何負汝乃反趣解甲降遂揮劍連斷數槩賊刺公墮馬死追封高陽郡公侑享太廟加贈泗國公謚武壯

桑世傑

桑世傑無為人甲午與廖俞蔡諸公結水寨巢湖乙未納款趙普勝畜異志公洩其謀上得歸和陽集商舟載勇士至黃墩攻敗普勝及曼濟哈雅趨入和陽諸軍大

集即攻破采石鱗魚洲鐵長官水砦取太平擒陳頤森
曼濟哈雅遁擒兆先入金陵拔鎮江尋下金壇丹陽從
圍常州攻寧國常州平陞判行樞密院事取馬馱沙克
大浦口江陰下太湖收宜興尋與諸將攻江陰石牌海寇
樂瑞陷陣死贈永義侯侑享太廟

論曰俞張趙耿桑五公暨胡武壯者皆以力戰死其所
摧敗功偉甚上公之褒侑享太廟與六王埒有以哉班
史云朽骨枯于墓苗裔流于道故東漢之續元勲在錄

遺老者加之意焉

今獻備遺卷三

欽定四庫全書

今獻備遺卷四

明 項篤壽 撰

王禕

王禕字子克金華義烏人大父炎澤夢五色芝產于門
而生禕長身山立有偉度師事黃潛與宋濂齊名弱冠
游元都上萬言書不報臨川危素太原郝遠者圖等交
薦之有齊琦者善康節數推言天人興衰甚有驗見禕
歎曰公異代人物也禕知元室將亂走歸隱青岩山中

高皇帝下金華遣使徵禕謁見行在所署中書省掾參
與機務語必稱子充而不名數於上前論文章上輒稱
善因命采故實為四言詩以授皇太子上親征江西禕
進平江西頌上覽喜曰知浙東有二儒卿與宋濂耳學
問之博卿不如濂才思之雄濂不如卿授江南儒學提
舉司校理除侍禮郎兼引進使遷起居注陞同知南康
府事洪武元年召還議禮不合出判漳州上䟽言祈天
永命在修德修德之要在法天道順人心願寬刑威減

賦稅以固國本上嘉納之二年詔修元史召禕與宋濂總裁書成拜翰林待制同知制誥兼國史院編修官預教大本堂出使吐蕃尋召還五年上以雲南弗臣命禕持詔往諭之禕即日就道既至見梁王君臣諭以禍福梁王君臣相顧駭服已有降意乃改館而加禮焉未幾元之遺裔有自立朔漠者遣使托克托徵糧餉于雲南且欲連兵以拒王師知梁王持二心因以危言迫梁王梁王兩可未決命達爾瑪匿禕于民間爾瑪知之愈責誚

梁王不得已出禕見之托克托欲以威屈禕禕罵曰天訖汝元命我朝實代之我天子使豈為汝屈有死而已顧謂梁王曰汝朝殺我大兵夕至矣遂被害時六年季冬之二十四日也八年上復命刑部尚書吳雲諭雲南而梁王使其鐵知院等二十餘人使漠北為王師所獲械送京師上釋而歸之令與雲俱至雲南之沙塘口鐵知院等謀曰吾屬奉使不達中道被執而還罪必不免乃說雲改易制書共紿梁王雲不從欲殺之而梁王亦遣

人來劫雲使降命易服束髮以見雲厲聲斥之遂死十
四年命征南將軍傅友德等伐雲南生擒達爾瑪梁王
走死禕及雲死事始聞于朝革除間贈禕翰林學士諡
文節文臣有諡自禕始正統間改諡忠文而雲未有卹
典

論曰昔李希烈殺顏真卿而王廷湊不殺韓愈夫事固
有幸不幸也世多謂子充不即死又從匿民間嗟乎豈
知子充者哉

王紳

王紳字仲縉，諱仲子也。警敏絕人，貫穿經史，百家言為文，縱橫出入數千言，可立就。宋濂見而奇之，曰：「王華川其有後乎！」一時材俊皆遜服。洪武二十五年，蜀獻王聞其賢，以書幣聘之，教授蜀郡。請于王，走雲南求祿，遺骸不獲，即死所祭焉。號慟幾絕，過者泣下。述滇南慟哭記。建文君即位，言官交薦，召為國子博士，遂入詞垣，編摩高皇帝實錄。嘗以祿死，事聞于朝，得贈諡。庚辰冬卒于

官所著有繼志齋集三十卷子徐有文行有祖父風

孫炎

孫炎字伯融金陵句容人也博學雄辨有口才善詩歌
好飲酒所交皆豪俠炎負氣蔑視章句儒衆中常自許
曰孫炎豈齷齪輩伍耶高皇帝既下金陵開省江南聞
炎名召見炎陳元運將終宜延攬智能以圖大業上大
喜論事慷慨所謀多當上意從下浙東擢同知池州府
事改池州為華陽府即拜炎知府事召為省都事會處

州降乃命耿再成守之而以炎為總制錢穀兵馬悉委之不取中報且以省符未署者付之聽得自辟署炎匹馬入處州時城外皆賊營不奉官府約束炎坐廳事召城中人諭以元將亡及上起兵意爾等皆良民奉法則生否必死語極剴切城中人皆叩頭流血誓不敢有二心炎復下檄旁縣徧諭之由是悉投戈降炎乃擇其驍勇者練為兵而以衆所推服者長之賊至即率以殺賊事罷散歸為農有警馳召之莫敢後者奸吏豪族畏之

如神皆謂得孫使君晚時上方寤寐豪傑而秀民有才
能者皆竄匿山谷中炎訪得姓名為書招之青田劉
基最有名自以嘗仕元耻事二姓使者再往返不起以
寶劔一奉炎炎賦詩報之以為劔當獻之天子我人臣
不敢私用封還之且為書數千言開陳天命人事以論
劉亡何就見炎炎置酒高會縱論古今成敗疊疊可聽
劉深嘆服曰基始自謂勝公今聽公論議基何敢望也
炎以口舌安反側郡上方征伐無一兵與炎苗將賀仁

德李祐之叛襲炎而炎所練卒反應賊炎被擒幽空室
中列卒環守脅炎降炎給之曰若生吾吾能成若事賊
知炎非本意恐自遺患乃夜以燭鴈斗酒饋炎曰以此
與公訣炎拔佩刀割啖之舉卮酒引滿仰天嘆曰嗟乎
大夫乃為鼠輩擒邪飲酒自如卒令解衣炎大罵曰賊
狗奴此紫綺裘乃主上賜我者賊勿解我當服此裘以
死賊遂殺炎而守將耿再成方與客飲聞苗軍反即上
馬收戰卒不滿二十人迎賊罵曰爾衆俘國何負於汝

汝反耶趣解甲降不降吾斬汝汝謂吾劍不利耶賊怒
欲刺再成再成運劍奮鬪連斷賊數槩賊躍而前槩中
再成頸再成遂墮馬大罵不絕口而死再成死炎無援
故及於難高皇帝既即位追封再成為高陽郡公炎丹
陽縣男建廟處州歲時祀之炎妻王氏靖難初王師入
金陵不屈死

論曰國初死忠者如王禕之使滇希烈之真卿也花雲
之守姑孰祿山之杲卿也韓成之誑楚沛公之紀信也

張子明之偽盟晉人之解揚也而胡越國之死金華孫
眠之死枯蒼其事與唐張鎬李絳頗類要之皆能死者
其真烈丈夫哉

胡大海

胡大海字王甫泗之虹縣人高皇帝駐兵滁陽杖策謁
見語合遂居前鋒從克和州渡江拔采石太平克金陵
與徐達等攻下京口毘陵皆先登授右翼統軍元帥宿
衛帳下從破宣城副鄧愈戍守取績溪進攻徽州拔之

元將楊諤率衆十萬取臨安而命鎮撫李才攻圍徽州大海自婺源兼程以進橫槊大呼斬李才擒其將呂旺呂昇賊衆敗走克嚴州遷樞密院判大海與諸將議曰蘭谿密邇嚴州蘭谿下婺源右臂斷矣引兵攻下之從上取婺州陞僉行樞密院事攻下諸暨州而張士誠復遣呂珍圍諸暨堰水以灌城大海馳救奪堰水灌珍珍勢蹙乃於馬上折矢誓求解兵大海許之都事王愷曰賊狡滑難信不如擊之可大勝也大海曰比若再來吾

當取之言出而背之不信既縱而擊之不武遂引還人服其威信取衢州遂攻處州克之陳友諒寇龍江上命大海出兵擣信州乃率師攻破信州時信方絕糧衆請還師大海曰信乃閩楚襟喉奈何棄之繕城浚隍為堅守計上以嫫為浙東大藩通甌引越非得重臣守之不可乃授大海江南等處行中書省叅知政事守金華苗將蔣英劉震等謀叛率衆入省署陽請大海觀弩八詠樓下遂遇害併殺郎中王愷嫫人莫不流涕上聞之震

悼為文以祭命配享晉卞壺廟追封越國公謚武莊
論曰國初死事者多矣惟胡越公最著聞高皇帝之初
下金陵也疆宇未廣首取浙東專城之責付之胡耿禍
發肘腋雖知乏先幾而仗節以死可謂壯矣成敗寧足
計乎

花雲

花雲者懷遠人也少孤隨母更嫁張氏驍勇絕倫癸巳
謁高皇帝於滁陽使將兵略地所向輒克破懷遠城俘

其帥以歸攻全椒拔之上將取滁州雲單騎前驅猝遇賊數千人遮道顧後騎未至欲退走不可雲獨提劍躍馬衛上橫衝賊陣而出賊驚曰此黑將軍勇甚不可與爭鋒後騎至遂克滁從取和州得兵三百人以功授管勾渡江先登克采石取太平上以雲重厚可託因命宿衛常在左右從克金陵陞總管徇下鎮江丹陽丹徒金壇諸縣過馬馱沙劇賊數百人邀戰雲且行且鬪三日夜悉擒殺之授前部先鋒判行樞密院克常熟得兵萬

人命雲將之拔常州守牛塘營領兵趨寧國時羣盜蟠
結所在梗塞雲操戈前行遇賊輒鬪斬首數千出入榛
莽泥淖中凡八日始達寧國尋命守太平陳友諒以舟
師入寇圍太平雲率麾下三千人迎戰相持者三日友
諒不得入乃引大舟泊城西南軍皆緣舟尾攀堞而上
城中乏食而雲士馬俱憊城遂陷賊縛雲急雲怒罵曰
賊奴爾縛我我主必滅爾斬爾為膾也遂奮躍大罵縛
盡解奪賊刀格殺五六月人復罵曰賊奴非我主敵也曷

不趣降賊怒碎雲首縛之舟檣衆射之雲至死罵不絕口知府許瑗院判王鼎皆被執不屈而死吳元年上追悼雲封東邱郡侯瑗高陽郡侯鼎太原郡侯立祠太平命有司歲時祀之方雲與賊戰甚急妻郃氏抱其所生三歲兒拜家廟泣謂家人曰今城且破吾夫忠義人必以身死之夫死吾必不獨生然花氏獨此一兒若等幸善視之聞雲就擒即赴水死侍兒孫氏收郃氏屍瘞之遂抱兒走匿為陳軍所獲至九江軍中惡小兒啼數欲

棄之水孫氏乃潛以簪珥屬漁媼養之王師伐漢漢敗
孫氏脫身至漁家視兒矚漁人出竊負而走宿陶穴中
明日僦舟渡江遇陳軍敗還爭舟猝孫氏及兒投之江
方出投波中有斷木自上流浮來附之入蘆中採蓮實
啗兒凡七日不死忽夜半聞人語聲呼之則一老父也
問其姓名曰我雷老也告之故偕行達上所上聞雲有
兒即召見孫氏涕泣抱雲兒再拜上亦泣數行下抱雲
兒坐膝上曰此花雲兒將種也命賜老父衣老父已不

見追之無所得衆以為神雲兒八歲入侍皇太子就學
年十三授虎賁後衛副千戶陞水軍左衛指揮僉事名
煒

論曰國初死忠節者惟花雲最烈而王禕孫炎次之至
其妻之死夫妻之存孤事尤卓異即睢陽常山寧足多
哉

廖永安

廖永安字彥敬廬州巢縣人也與俞通海等屯巢湖為

水寨左君弼據廬永安等數為所窘乙未聞高皇帝駐
和陽遣人納款且乞援高皇帝大喜親馳赴之永安與
弟永忠及諸將奉迎登舟出湖口攻敗元中丞曼濟哈
雅水軍徙還和陽六月朔從渡江乘風齊發永安舉帆
前導須臾及牛渚守者大駭諸軍奮擊之遂拔采石乘
勝取太平授總管克蕪湖大破海牙軍俘獲萬計擒陳
兆先從攻集慶克之拜昭武大將軍統軍元帥與徐達
等攻克鎮江毘陵以功陞同僉行樞密院事宿衛帳下

克池州樅陽奪馬馱沙陞同知樞密院事再破張軍于福山港及狼山與徐達等攻復宜興轉戰太湖孤軍深入為士誠將呂珍所獲永安不屈遂拘囚之丙午七月丁未卒于姑蘇追封楚國公諡武閔改封鄖國公

論曰初高皇帝駐和陽渡江無舟賴永安諸將以舟師迎附得渡定基金陵厥功不細矣永安雖幽囚死不究厥成其節義固足稱也

濮真

濮真鳳陽人也以忠勇受知高皇帝從渡江定金陵破
吳楚北定中原皆與有功由副元帥擢西涼衛指揮陞
都督僉事洪武初征高麗兵敗被執高麗王詰之曰無
故加兵亦有說乎真曰天子神聖撫有華夏爾國叛服
不常遣使諭意不奉明命遣將聲討豈無故耶王愛真
驍勇徐曰吾欲用爾為將亦不失富貴真厲色斥之即
拔所佩刀剖心而死王大懼遣人詣闕謝罪併歸真從
行兵士上喜真忠節追封為樂浪公子璵甫生數月即

襁褓中封西涼侯幼趨朝為多士蹋傷母夫人以聞上命御用監鑄一字玉牌懸其冠上每朝俾人避之

論曰濮公剖心不顧一死而夷人失色使國勢重於九鼎真烈丈夫哉

韓成

韓成虹縣人也壬辰從高皇帝起兵徐泗間破諸山寨甲午克滁州授鎮撫守禦乙未從渡江進克金陵下京口陞元帥守禦金壇從攻常州解牛塘之圍取揚州戊

戊從下婺州復池陽敗陳友諒於龍江及取江州南昌
皆與有功癸卯陞帳前總制親兵左副指揮使專侍宿
衛四月陳友諒率師六十萬圍南昌七月從上親征大
戰鄱陽湖自戊子至庚寅三勝之復鏖戰良久賊悉衆
合圍數重矢石雨下一時諸將計無所出上方設奇成
進曰臣聞古有殺身以成仁者臣不敢辭也遂賜成龍
袞冠冕與上服同對賊投水中死陳軍皆呼萬歲遂解
圍御舟乘間得脫竟殲友諒封高陽郡侯建祠康郎山

設像祀之成位第一子觀累官都督同知洪武中數討
破廣西諸蠻寇及征五開有功革除末年掛征南將軍
印廣西操練軍馬尋鎮守廣西永樂九年征交趾既平
留觀鎮守十二年卒

論曰彭蠡之戰諸將死行間者甚衆廟祀康郎山者凡
三十六人而韓成功第一其事與紀信誑楚絕相類至
今廣西人談觀威略猺獞畏之如神與山雲齊名語有
之蠋飛涓涓育子為蠶觀誠賢不猶出其父之型范乎

張子明

張子明者不知何許人國初授千戶從守洪都歲癸卯四月陳友諒悉發國中兵號六十萬圍洪都親督兵晝夜攻城期必拔守將大都督朱文正等嬰城固守被圍者八十五日六月文正遣子明告急於建康子明取東湖小漁舟夜從水關潛出越石頭口夜行晝伏半月始達建康工問友諒兵勢何如子明對曰友諒兵雖多而戰鬪死者亦不少今江水日涸賊之巨艦將不利用老

師食少方轉漕武昌若援兵至可必破也上曰汝歸語文正為我堅守一日吾當自取之不足慮也子明還至湖口為陳軍所執友諒曰若能誘城降非但不死且得富貴子明偽許之至城下大呼曰大軍百萬至矣固守以待友諒怒殺之後封忠節侯廟祀洪都

于光

于光字大用南康都昌人也元末從徐壽輝署江東宣尉元帥鎮鄱陽陳友諒既弑壽輝光謂其麾下曰我不

殺友諒可事之乎庚子以饒州來附高皇帝命鄧愈往鎮之光佐焉以功拜江西行省叅政尋授行樞密院判改戍徽州召還解金連環并繒賜之光頓首謝曰臣蒙厚恩敢不效死辛丑從上親征友諒取安慶江州壬寅從下南昌癸卯從破友諒於彭蠡轉振武衛指揮同知甲辰從平武昌陞鷹揚衛指揮使乙巳取淮東諸郡吳元年擒張士誠皆與有功洪武元年與大將軍徐達等北伐下山東河南諸郡拔潼關承制以光戍守其地大

敗元兵二年移鎮鞏昌王巴拜屢引兵來寇輒擊走之
保保復移軍圍張濫于蘭州光馳救之遇賊于馬蘭灘
戰敗被執至蘭州城下使呼張將軍出降光大呼曰我
不幸被執公等堅守大將軍總百萬師至矣賊怒批其
額而死

論曰豫章忠臣廟凡十四人而子明位第八及考死事
獨子明最奇方其冒重圍出百死以走金陵晝伏夜行
竟致其命斯可謂忠且智矣身雖被執以死而大呼不

屈城守益堅卒完孤城以殲大憝于光事畧相類因以附焉

今獻備遺卷四